

Su abogado Hulandes a musta: **Joran ta disponible pa interrogacion**

ORANJESTAD(AAN):

Cuerpo Policial di Aruba y Hulanda, sa unda Joran van der Sloot ta y e ta disponible pa interrogacion! Esaki segun su abogado Hulandes Bert de Rooij, den e programa di television NOVA.

Fiscal mayor di Ministerio Publico Hans Mos ta acepta oferta di Joran, pa e worde interroga. mr. Mos ta spera di papia cu e sospechoso dentro di poco.

Segun de Rooij, e interrogacion lo por tuma lugar e siman aki mes.

Ultimo biaha cu van der Sloot tabata na Aruba, el a tene su boca cera. Pero awor si, diripiente, e ta "dispuesto" pa bay polis y duna un declaracion boluntario.

Peter R. de Vries a bisa cu esaki ta bon noticia.

Motibo pa e asunto aki ta e grabacion scondi den cual Joran ta bisa cu Natalee a muri cune riba beach.

Joran ta keda para ariba sinembargo, cu e storia cu el a conta Patrick van der Eem den auto, ta completamente inventa. Pero como 74% di tur Hulandes ta kere cu di berdad Joran ta culpable di morto di Natalee.

Door di e atencion masal cu e asunto aki a haya, Joran a worde hiba un caminda cu no ta conoci, pa evita cualkier eventualidad.

Segun abogado de Rooij, durante e listramento a bay cu un harddisk for di cas di su wela y un laptop for di su cas di estudiante na Arnhem.

Segun e abogado, su cliente ta hopi relaxed pasobra ta facil pa comproba, cu loke el a declara na e informante, ta completamente falso..

Sinembargo e abogado a remarca cu Joran tabata hopi afecta pa e hecho cu tabata tin varios reaccion di menaza.

Van der Sloot lo ta lamenta tambe loke el a bisa den e auto.

E abogado a sigui bisa tambe cu Joran ta un mentiroso compulsivo y cu e ta adicto na e wega di Poker.

Segun e abogado, Joran a conoce van der Eem den casino y el a haya e impresion di van der Eem, cu e lo por gana hopi placa cune, den circuito criminal.

Pesey el a conta e storia na van der Eem, pa impresionar e persona aki.